

मार्निंग डोगरी न्यूज़ बुलेटिन, समे. 09-20 Hrs

<><><><><><>

## Headlines

- पोलैंड दे दौरे पर गेदे प्रधानमंत्री नरेन्द्र मोदी होर अज्ज वारसाँ च उत्थूं दे प्रधानमंत्री डोनाल्ड टस्क हुंदे नै गल्लबात करगंन।
- विधानसभा चुनाएं दी घोषणा बाद जम्मू कश्मीर च सियासी गतिविधियां तेज, सब्बे पार्टियां मतदाताएं गी रिज्ञाने च लग्गी पेदियां न।
- गृहमंत्री अमित शाह होरें 2024 दी री अमरनाथ जी दी यात्रा गी रमानदारी सिर करोआने लेई सुरक्षाबलें ते जम्मू कश्मीर प्रशासन दी सराहना कीती ऐ।
- आदर्श अचार संहिता दी कुसै बी चाल्ली दी खलाफवर्जी पर नजर रखने लेई जम्मू ते श्रीनगर च विशेष कमान ते कंट्रोल सेंटर कायम कीते गे न।

<><><><><><>

## PM-Poland

प्रधानमंत्री नरेन्द्र मोदी होर पोलैंड दी अधिकारिक यात्रा पर न। प्रधानमंत्री होर अज्ज वॉरसा च पोलैंड दे प्रधानमंत्री डोनाल्ड टस्क हुंदे कन्नै प्रतिनिधिमंडल सतह दी गल्लबात करगंन। दवै नेता दपक्खी सरबधें दी समीक्षा करगंन ते केई महत्वपूर्ण मुद्दें पर चर्चा बी करगंन। दौनें पक्खें बश्कार बैठक च होरने विकल्पें पर गल्लबात होग। प्रधानमंत्री नरेन्द्र मोदी पोलैंड दे राष्ट्रपति आंद्रेज डूडा हुंदे नै बी मलाटी करगंन। एह्दे थमां पैह्ले प्रधानमंत्री हुंदा औपचारिक सुआगत बी कीता जाग। ओह् अज्ञात सैनिकें दे स्मारक पर पुष्पांजलि भेंट करगंन। प्रधानमंत्री बपारिक नेताएं ते पोलैंड दे मन्ने-परमन्ने दे लोकें कन्नै बी गल्लबात करगंन। जंदी रातीं वारसा च भारतीय समुदाय दे लोकें कन्नै गल्लबात करदे होई प्रधानमंत्री होरें आखेआ ऐ जे अज्जे दा भारत सब्बने कन्नै जुड़ियै सब्बने दा विकास ते कल्याण चांह्दा ऐ। प्रधानमंत्री मोदी होरें आखेआ ऐ जे दहाकें थमां भारत दी नीति दूरी बनाने आली रेही ऐ पर अज्ज भारत दी नीति सब्बने देशें कन्नै गैहरे सरबंध बनाने दी ऐ।

<><><><><><>

## Assembly Elections

केन्द्र शासत प्रदेश च विधानसभा चुनाएं दी घोषणा कन्नै गै प्रदेश च सियासी गतिविधियां तेज होईं गेइयां न। बक्ख-बक्ख सियासी पार्टीएं अपने प्रचार अभियान गी तेज करी दित्ता ऐ। जारी अधिसूचना मूजब जम्मू कश्मीर च चुनां त्रै गेड़ें च करोआए जांगन। पैहले गेड़ तैहत मतदान 18 सितम्बर गी होना ऐ। वोटें दी गिनतरी आला कम्म 4 अक्टूबर गी होग।

<><><><><><>

## Rahul-JK

लोकसभा च विपक्ष दे नेता राहुल गांधी ते कांग्रेस दे अध्यक्ष मल्लिकाअर्जुन खरगे होर अज्ज श्रीनगर ते जम्मू च पार्टी कारकूर्ने गी संबोधत करगंन। उंदा श्रीनगर च इक प्रेस कांफ्रेंस करने दा बी कार्यक्रम ऐ। दवै कांग्रेस नेता कल संजा 2 दिन दे दौरे लेई श्रीनगर पुज्जे हे। इस दरान ओह् औंदे विधानसभा चुनां दरान पार्टी दी तैआरिएं दा जायजा लैंगन। गांधी ते खरगे होर नैशनल कांफ्रेंस गइबंधन बारे संभावनाएं दा बी पता लांगन। उंदा नैशनल कांफ्रेंस दे प्रधान डॉ. फारूक अब्दुलला ते उप-प्रधान उमर अब्दुल्ला हुंदे कन्नै मलाटी करने दा बी कार्यक्रम ऐ। दवै नेता पार्टी कार्जकर्ताएं थमां चुनाएं बारे जमीनी सतह् दी तैआरिएं दा जायजा लैंगन। तोआई एआईसीसी दी स्क्रीनिंग कमेटी दे प्रमुख एस.एस.रंधावा होरें जम्मू ते कश्मीर खित्ते दे बक्ख-बक्ख प्रतिनिधिमंडलें कन्नै मलाटी कीती।

<><><><><><>

## BJP

जम्मू कश्मीर लेई भारतीय जनता पार्टी दे संगठन महासचिव अशोक कौल होरें आखेआ ऐ जे औंदे विधानसभा चुनाएं च जम्मू कश्मीर दे लोक बीजेपी दा समर्थन करगंन की जे लोकें एह् सैहमति लैते दा ऐ जे इत्थें रमानदारी ते स्थिति च सुधार बीजेपी दे कारण गै मुमकिन होईं सकेआ ऐ। अनंतनाग च पत्रकारें कन्ने गल्लबात करदे होईं कौल होरें आखेआ जे पिछले 5एं ब'रें दरान जम्मू कश्मीर च जेहड़े नतीजे जमीनी सतह् दा दिक्खने गी लब्धे न ओह् करना कुसै होर पार्टी दे बसै दी गल्ल नेईं ऐ। उनें मेद प्रगट कीती जे मतदाता बीजेपी च अपना बसाह् भरोसा रखदे होईं उसी समर्थन देंगन।

<><><><><><>

PDP

पीडीपी प्रमुख ते साबका मुखमंत्री महबूबा मुफती होरें आखेआ जे उंदी पार्टी आतमसम्मान कन्नै शांति चांहदी ऐ नां कि बरबादी गी दिक्खियै चुप रौहना। मुफती हुंदा एह ब्यान साबका एमएलए चौधरी कमर हुसैन हुंदे आस्सेआ पीडीपी च शामिल होने लेई आयोजित कार्यक्रम दरान मीडिया गी संबोधत करदे होई आया। उनें आखेआ जे पिछले 5एं बरें च जम्मू कश्मीर ते पीडीपी नै केई चुनौतिएं दा सामना कीता ऐ।

<><><><><><>

NC

जम्मू कश्मीर नैशनल कांफ्रेंस दे महा सचिव अली मोहम्मद सागर होरें कथित तौर पर दोश लाया ऐ जे सरकार जम्मू कश्मीर दे लोकें दी विकास ते सियासी आसैं-तांगे गी पूरा करने च असफल रेई ऐ। पार्टी कारकूनें गी संबोधत करदे होई उनें आखेआ जे लोडचदी नुमायंदगी नेई होने करी जम्मू कश्मीर दे लोकें गी मुश्कलें ते परेशानिएं दा सामना करना पेआ ऐ।

<><><><><><>

Apni Party

औंदे विधानसभा चुनाएं गी दिक्खदे होई अपनी पार्टी ने कल अपना चुनावी घोषणा पत्र जारी कीता ऐ। इक प्रेस कांफ्रेंस गी संबोधत करदे होई अपनी पार्टी दे जनरल सैक्रेअरी रफी अहमद मीर होरें आखेआ जे पार्टी जम्मू कश्मीर दा राज्य दा दर्जा ब्हाल करने लेई लड़ोग। उनें गलाया जे उंदी पार्टी कश्मीरी युवाएं पर लाए गेदे पीएसए खलाफ अवाज पुट्टोग। उनें आखेआ जे उंदी पार्टी जमीन, नौकरिएं दी हिफाजत ते कश्मीरी पंडितें दी वापसी लेई कम्म करोग ते कश्मीर खित्ते लेई सदिएं दरान 500 युनिट मुफ्त बिजली देग। अपनी पार्टी नै दफा 371 दे प्रावधाने दा बी वायदा अपने चुनावी घोषणा पत्र च कीता ऐ।

<><><><><><>

Shah Yatra

केन्द्री गृहमंत्री अमित शाह होरें 52 दिनें तगर चली दी श्री अमरनाथ जी दी यात्रा गी रमानदारी ते बवस्था आले ढंगै सिर तोड़ चाढ़ने लेई जम्मू ते कश्मीर प्रशासनख सवयं सेवी संगठनें ते सुरक्षाबलें दी भूमका दी सराहना कीती ऐ।

इस ब'रे दी यात्रा दरान 5 लक्ख 12 ज्हार थमां मते श्रद्धालुएं पवित्र गुफा च मत्था टेकेआ ऐ। इस ब'रे एह यात्रा 29 जून गी शुरू होई ही ते 19 अगस्त रक्खड़ पुन्नेआ आले दिन सम्पन्न होई गई ही। गृहमंत्री होरें इस यात्रा गी सफल बनाने लेई सारे सुरक्षा कर्मिएं, श्री अमरनाथ जी श्राईन बोर्ड, जम्मू कश्मीर प्रशासन ते स्वयसेवी संगठनें गी मुबारकबाद दित्ती। सोशल मीडिया दी इक पोस्ट पर शाह होरें आखेआ जे सारे सरबंधी घड़े इस सलाना यात्रा गी सुरक्षत ते बवस्था आले ढंगे सिर करोआने लेई टकोहदा योगदान दित्ता ऐ। उनें प्रार्थना कीती जे बाबा बर्फानी सब्बनें पर अपनी कृपा बनाई रक्खगंन।

<><><><><><>

## Command Centre

जम्मू कश्मीर च गलत प्रचार रोकने लेइ ते ओंदे विधानसभा चुनां दरान चुना प्रक्रिया दी प्रभाविकता बनाई रखने लेई जम्मू ते श्रीनगर च मुख् चुनां अधिकारिएं दे दफतरै च कमांड ते कंट्रोल केन्द्र कायम कीते गे न। आकाशवाणी दे संवाददाता दी रिपोर्ट मूजब 20एं डी.सी दफतरें च हफते दे 7एं घ्याडे 24 घेंटे कम्म करने आले कंट्रोल रूम स्थापत कीते गे न। भलेआ अज्जै कल्लै आली तकनीक कन्नै लैस कमांड ते कंट्रोल केन्द्र दा ढांचा बी भलेआ आधुनिक ऐ। एह 24 घेंटे कम्म करगंन ते चुनां कन्ने सरबंधी कुसै बी गतिविधि पर तक्क रक्खगंन। कुसै बी फर्जी खबर जां ब्यान पर तुरत कारवाई कीती जाग। एह जम्मू कश्मीर दिएं सब्बनें 90 असैंबली हलकें दी स्थिति दा लगातार जायजा लेंदे रौंहगन। उनें आम लोकें गी अपील कीती जे लोक आदर्श आचार संहिता दी कुसै बी चाल्ली दी खलाफवर्जी दी शकैत लेई ते उस गल्ला गी उजागर करने लेई सी-विजिल ऐप दा इस्तेमाल करन।

<><><><><><>

## Space Day

समूलचे मुख् च कल पैहला राश्ट्रीय अंतरिक्ष दिवस मनाया जाग। एह जानकारी केन्द्र अंतरिक्ष राज्य मंत्री डॉ. जितेन्द्र सिंह होरें कल नमीं दिल्ली च इक प्रेस कांफ्रेंस च दित्ती। उनें आखेआ जे पैहली बारी मनाया जा'रदा एह घ्याड़ा छड़ा इक समारोह जा आयोजन नेई होग सगुआं अंतरिक्ष क्षेत्र च नमियां उपलब्धियां हासल करने लेई भारत दे पक्के धेइयै ते भविकख लेई संकल्प दी इक झलक बी ऐ। साढे संवाददाता नै जानकारी दित्ती ऐ जे राश्ट्रीय अंतरिक्ष दिवस मनाने दे सिलसिले च पिछले म्हीने मुख् दे बक्ख-बक्ख हिस्से च कोई इक ज्हार कोला मते कार्यक्रम दा आयोजन कीता गेआ। पिछले ब'रे इस्से रोज यानि 23 अगस्त गी भारत दे चन्द्रयान-त्रै मिशन दे विक्रम लैंडर नै चन्द्रमा दी सतह पर साफ्ट लैंडिंग कीती ही।

<><><><><><>

## Mountains

पर्वतारोहण यानि पहाडें पर चढ़ने दिएं अपनिएं उपलब्धिएं च इक होर कामयाबी दर्ज करदे होई कठुआ जिले दे पर्नगोली ग्रां दी इक कुड़ी सुमन वर्मा नै पच्छमी रूस च पौंदी यूरोप उपमहाद्वीप दी सब्बने शा उच्ची पहाड़ी किंगर माउंट एलब्रेस पर पुज्जियै तरंगा झंडा फैहराने दा कारनामा करी दस्सेआ ऐ। उन्नै 17 अगस्त 2024 गी 5 ज्हार 642 मीटर मतलब 18 ज्हार 510 फुट उच्ची इस पहाड़ी किंगर पर पुज्जने च च कामयाबी हासल कीती। सुमन वर्मा वल्द सरदारी लाल वर्मा दा आखना ऐ जे उंदी इस उपलब्धि दे पिच्छे उंदे परोआर आले दा बड़ा मता योगदान ऐ। घर पुज्जने पर सुमन दा उंदे परोआर आलें ते ग्रां दे लोकें निग्गा सुआगत कीता। कठुआ दे जिला विकास कमीशनर डॉ. राकेश मिन्हास होरें डीसी दफतर च उंदा सम्मान ते सुआगत कीता। इस मौके आखेआ.....

<><><><><><>

## FIRs Gattu

गट्टू डोर दी बिक्री ते इस्तेमाल करने पर पुलसै जम्मू दे जानीपुर इलाके दे दऊं लोकें खलाफ एफआईआर दर्ज करियै उंदे घरा ते हट्टी थमां गट्टू डोर बरामद कीती ऐ। एह कारवाई जम्मू नार्थ दे तैहसीलदार ते पुलसै दी इक टीम आस्सेआ सांझे तौरा पर कीती गई। जम्मू दे जिला मैजिस्ट्रेट नै पैहले गै सब्बने अग्गे गजारश कीती दी ऐ जे गट्टू दा इस्तेमाल जां बिक्री नेई करन ते खबरदार कीते दा ऐ जे हुकमै दी खलाफवर्जी करने आले खलाफ सख्त कारवाई कीती जा

<><><><><><>